

Mihor mi “wanta e yotchi” y no ta un “Flor di caminda”

Frida a tende ora mi a bisa **Johnny** cu mi ta den “cobeit” y e no tabata sa kico el a tende. El a cuminza puntra rond kico esey kiermeen. Ta Johnny finalmente a contest’e cu **mi ta den cercania, of na lugar di custumber pafo den e area aki**.

Esaki a ponemi pensa riba e cantidad grandi di hende riba nos isla cu a lubida nan **papiamento di antaño** cu parce ta bay perdi si nos no haci algo pa mantene na bida. Hopi di **nos bunita palabranan di antaño y nos expresionnan a muri y ta dera den kelder** di olvido. Kizas nan lo por resucita un dia.

Ora mi a puntra kico ta **un holoshi colga na un leontina**, ningun por a dunami un contesta. Ningun por a pensa riba e holoshinan di antaño colga na un cadena di oro bruto y cu ta pega na faha of na rand di carson.

Mi a haya smaak den sigui cu e wegá y a puntra unda den cercania por tin un **“wincharge”**. Pa mi mala suerte ningun hende por a indicami unda tin un **molina cu ta draai den biento, carga batería** pa haya coriente.

Si tin **tempo di calamason**, esta cu no tin biento pa draai e **wincharge** pa e funciona normal, ta hiba e batería na un garashi pa e wordo carga.

Mas despues ayera mainta a cay un **pal’i awacero** pero el a dura masha poco. Mi a bisa cu no ta ni **“awa di julei”** y mira con nos a haya un yobida asina casi mey mey di maart. E **“awa di julei”** ta e tempo di awacero cu nos ta haya na juli **despues di celebracion na juni di Dia di San Juan**.

Nos idioma ta **yen di palabranan di antaño** cu ainda no ta poni den buki pero tin tambe cu ta haya e palabranan aki pero cu nos no ta pone tino y trata na sa di unda nan ta bini y kico nan ta significa. Ta masha poco buki tin di esaki, y mi ta kere – **no cit’ami-** cu ta ni 5 buki.

Mi a dicidi di bira papel tras di papel saca di un cahita yen di papel los cu mi tin, cu tur sorto di topico, y mi a haya listanan di palabranan bieu y expresionnan bieu. Mes ora mi a pensa cu a bira tempo pa pone tur esaki hunto y cuminza traha riba un buki nobo di **palabranan di ayera y antayera**.

Candelía ta un di e palabranan cu mi wiowo a cay ariba mes ora. Si puntra **kico un candelía ta**, mi ta sigur cu mayoria di hende lo bisami **“mi no sa, “Mi nunca a tende di dje”**.

Un **candelía ta un sorto di bichi** cu ta biba den tera. Ora planta (bonchi, patia of tambe pampuna y cu simia sali, e **candelía** ta come esakinan. Si bira e tera, e **candelía** ta sali y solo ta mat’e

Mi a topa tambe cu papel cu anotacionnan relaciona cu **luna**. Den tempo di antaño **luna tabata masha importante** pa nos hendenan. Te awe tin hende cu no ta laga e kerencianan aki pa loke nan ta. Nan ta kere firme den nan.

Prome cu e dama **duna luz**, ta busca den diferente di e **bukinan di horoscopo of di remedi of di suerte**, di antes pa mira con posicion di luna ta, **prome cu duna luz**.

Pa matanan tambe tabata tira bista den buki pa mira **posicion di luna**. Por menciona por **ehemplo mata di kenepa macho**. Esaki tin hende ta **snoei e pa e pari**. Tambe pa **maishi y papaya** mester di mata macho den cercania. Den cercania di **mata di papaya cu ta florea** bo ta mira **abehanan** y esaki **algun dia despues di luna nobo**.

Hopi **cunukero of hende den horticultura of agricultura** tabata **tira bista riba posicion di luna** pa nan plantamento etc. **Cunukeronan tabata warda simianan** di maishi rabo, pinda of bonchi pa e aña venidero y pa haci esaki **nan ta tira bista riba con luna ta move**.

Otro importancia di luna antes y cu awe te ainda tin hende ta tene cuenta cune, ta di cortamento di cabey. Principalmente pa laga **yiunan bay barbero pa pela of si ta corta cabey na cas mes of bao di mata di kwihi** posicion di luna ta importante. Luna tabata importante pa hende muher **ora di rapa cabey** pa percura cu e cabey crece.

Otro palabra cumi a topa cune y cu pa hopi tempo mi no a tende of lesa, ta e **“potopoto”**. Mester **basha awa riba klei mescla cu yerba** y bo ta haya un **potopoto**... Esaki ta **un di e sorto di kleinan cu ta bira duro** y cu esaki ta **lodea e deposito of magasin**. Esta, **yena e baranan gevelecht di loke nos por yama muraya** awe y cu man ta **tapa e baranan cu e lodo di klei** aki y ta manera pleister nan.

Tur hende a tende di e **cas di toro of di lodo**. E klei tabata wordo yama e **torto**. E torto tabata **klei muha y bruha cu paragas**, esta cu yerba seco. Di eynan a yega na diferente sorto di cas cu otro uso di e **klei**, **paragas of torto** te na e **cas di bloki** di tempo moderno. Den **cas di torto, pa e vloer** tabata **mescla e klei cu sushi di baca**.

Nos **piedranan** tambe tabata masha importante. Ta diferente sorto di piedra a hunga papel grandi den construccion di **nos casnan tipico**; di nos estilo arubano di e **cas di torto pa cas di piedra**, **pa cas basha** te yega na e **cas di bloki**.

E cas di piedra tabata otro. Pa esaki tabata tin un formaleta y pa e tempo ey cement a haci su entrada na Aruba y tabata bruha e cement cu piedra. A conoce e cement cu tabata yega Aruba cu barco for di Alemania pero tambe despues, e cement cu a duna vloernan y stupi e nomber di **vloer di potlan**. Esaki deriva di e marca di cement **Portland** (cement for di Portland)

Lagami tira bista unrato riba hende, y aki mi ta referi na e **persona mas importante den famianan** di antes. Esey ta **Madushi, Madoei, Madu, Wela, Welita** y cu te awe ta importante den mayoria di famia unda **Madushi** ainta ta na bida. Den famianan, **esun cu cabey na djente** tabata e **Madushi**, pero na mes momento tambe **esun mas stima**. E no ta sconde y ta bisa **bon cla loke e tin di bisa y ta ponebo na bo lugar mes ora sin warda pa despues**. Esun cu sa tur cos y tabata wordo trata cu masha respet. Tur loke bo kier sa ta cerca Madushi bo ta bay pa puntra y semper cu un conseho e contesta ta wordo duna. **Madushi** tabata mas bien e cabe-sante di famia antes, y den hopi famia awe ainda.

Tin cosnan di antes cu ta kreencianan cu ainda no a bay perdi. principalmente riba tereno di salubriad. Pishi di hende homber tabata masha slaudable den mondi. Esaki principalmente si bo dal pia of curpa den bringamosa. Ta djis **busca un mucha homber** y lagu’e **pishi riba lugar** cu bringamosa a hincabo y un, dos, tres, **grawatamento a desaparece**. Fuera di remedi humano tabata tin tambe e remede di aloe.. Te awe masha hopi hende tin un mata di aloe den cura di cas pa wordo usa como remedi pa un of otro malestar. Pa evita cu mester usa remedi mes, y pa core cu malessa, te ainda na hopi cas ta haya e aloe colga pafo na porta di entrada di cas of den cas.

Hasta pa cacho aloe ta bon. Bo ta trek aloe den awa, laga esaki para un rato bon, y despues ta laba cacho cune. E tempo ey tabata usa habon blauw y despues e mes habon hunto cu loke tabata e Lava Soap bruto, den e awa hetrek. **Cacho ta keda despues sin carpata y sin purga**, y su lana ta blink ademas manera di **Lassie of Rintintin** di e peliculan

Pa hende muher (hopi homber ta haci’e tambe) e blanco di aloe ta wordo usa pa laba cabey y ta laga cabey ta lombra y ademas e ta percura pa bo no haya casca. Popular tabata cu mama tabata pone yiu homber of yiu muher **rasca cabez cu peña pa kita casca**. E blanco di aloe tabata masha popular y ainda ta asina, ora di haya golpi pisa na curpa. Si ta na pia of man of na custia, ta mara esaki cu e blanco di aloe.

Mi ta corda cu mi a bisa un sobrino cu **Justin Bieber** parce un chochorogay. Ora el a puntrami kico mi kiermeen cu chonchorogay, mi mester a splike cu ora un persona tin un kuif grandi esey tabata e expresion: **Nan parce un chonchorogay**, un parha cu kuif.

Ni di bola, esta pa nada, e no kier a kere esaki te cu mi a busca foto di un chonchorogay pa mustre. Atami a topa cu e palabra **“bocatana”**. Esey ta cerca un machi mi a yega di tende esaki y haya splicacion. Mi no tabata conoce. **Lenso di bocatana** ta e lenso cu machinan tabata mara na cabez pa drumi anochi. E hombernan? Nan tabata bisti **carsonsiyo pia largo** y cu **flanel manga largo** te na pols.. no pone ningun di dos rabia anochi pa cualquier cos chikito pasobra e ora ey si **“bo tin cu wanta bo yotchi”**, bo tin cu wanta e consecuencia.

Mihor mi termina aki awe pa nan no bisa cu mi ta **“flor di caminda”**. Mi lo prefera di ta parce un **“moronton”**, un persona chikito y gordo, pasobra **“un flor di caminda”** ta nada otro cu **“sushi di cacho”**, pero na Aruba ken lo tin cunez?

Juby Naar